

一修族譜贈序（一）

氏族之有譜由來久矣非第誇耀世澤為觀美也其間支分派別有所以序次而聯屬之若網在綱如絲有緒俾後世子孫稔知木本水源胥歸於後紹其家聲則譜之所係不綦重哉余恭膺簡命授任茲土公事之暇延訪士民卽諄諄喻以孝弟為本其所講求敦倫睦族之誼者心甚踴之有太學生楚子邦瑾來謁辭氣安詳樸實守分士也出其手輯族譜一編囑余為敘余觀其譜中得姓之始考諸傳記亦既源流井然矣蓋其先以武功世襲襄陽衛官屬移長沙卜居湘邑因著籍焉迄今歷年已深楚氏子姓蕃衍克守其家遺訓者列於庠序成均俱彬彬有儒雅風是譜所梓為彙其族人交相砥歷共效善良亦司牧之樂與也生等從此爭自濯磨益加黽勉際茲昇平盛世而習詩書明禮義蘄為瀟湘間聞人有光宗祖豈不偉欤是為敘

清乾隆三十四年己丑嘉平月

下澣知湘陰縣事海昌許士杰譔

一修族譜贈序（二）

聞之禮宗廟之義莫嚴於尊祖尊祖故敬宗敬宗故收族以故禮行於廟中宗以大小拜以先後昭穆序而宗盟以篤及乎分茅胙土若魯衛毛那郇雍 邠 畢原豐郇以及凡蔣刑茅胙祭皆各世其國而爰及苗裔焉此周道親親之所以流澤長也此而名卿世族或氏其官或氏其族或氏其字若豕韋氏唐杜氏欒氏范氏季孟氏展氏其最著也春秋以後學士大夫博物君子猶能述其世次載在簡冊於以信今而傳後焉漢興以來史遷作史記凡功臣世族皆為世家年表整齊其世傳以垂之不朽自五代以及盛唐其官勲世胄史館編修實錄亦各附其傳註使考古者不傷其殘闕然或誌其一二氏以推及數世止矣安能舉一族之子姓世系分其支派溯其本源彙為譜牒藏之宗祠傳之子孫永垂不朽乎故宋之盛也文章理學千古罕儔而銘誌則間有之至於家譜之修則自眉山蘇氏有作而王荊公作宰相求為其父作一傳記而不能此余讀史每覽昔人興感之由不勝慨然也余自丙戌秋司鐸於湘見湘邑中巨族名家皆為宗宇置祀田以奉其祖宗以聯其子孫此古道也余思與湘人遊於古處竊慨慕之居無何有楚子太學生邦瑾暨廷上出所集族譜示余囑余為之敘余愧不能文但官以

教為名正宜勵風磨俗視此敦本睦族建祠修譜為風教之所係敢不
道揚一二以附於編右乎譜注所載楚以國為姓理或有之但世遠年
湮亦無世次可紀余第弗深考考其近者自宋迄明數百年於茲耳其
在宋也既有昭輔建中友聞諸人寄籍郴州蕃衍永興明太祖時始祖
楚成公以官勳襲封百戶勅命昭信校尉其長男楚端公襲授襄陽百
戶征調有功封長沙衛千戶勅命承信校尉永樂後軍丁繁盛各隸屯
田五世祖琳及弟珣屯長善陰潭明季世變珣之子孫遷善化惟琳之
子孫住湘陰清定鼎有伯玉公者仕陝西扶風縣令其在庠者不下二
十餘人成公一人之裔星羅碁布而居湘者則琳之支派也是則語官
勳則自宋而明自明而清炳炳麟麟卓有可紀考世次則自成而端自
端而琳綿衍世澤至今源源本本釐然不紊楚之得姓由來舊矣古曰
賢才出族將大此建祠修譜而後祖德流菁華發楚之一姓其後必大
可知矣是為敘

清乾隆三十四年己丑桂月既望日

湘陰縣儒學教諭蘆江周卜寧甸南氏記

一修族譜贈序（三）

余歸林久日以教學為事密巖旁有僻靜小莊因設帳於茲接壤如哲菴楚君暨姪玉哉金昆均屬世好氣誼肫篤不時往來仲秋玉哉持其家乘囑余為敘余以固陋辭及展卷閱之知為湘邑鉅族前人功業彪炳有未可泯滅者蓋自熊繹分封以國為姓累朝名公迭出史冊昭然明初一世祖楚成公以布衣起戎行從事金戈鐵馬間捐軀赴敵屢立大功定鼎後大封功臣二世祖端公賜蔭襄陽衛百戶復陞潭州衛千戶厥後世德發祥簪纓代襲有自來矣惟是本支蕃衍俱散處大湖以南五世祖瓊公移居善化行多善事成化十六年庚子捐地建立學宮至今善邑科名鼎盛頌其功不衰餘在三湘各邑或以文章著或以詩賦顯名遊泮水身列成均者代有傳人真世不絕賢矣夫以族姓之大若此前人功德之盛若此後支之賢又若此其可不窮流溯源分支別派著之譜牒以傳不朽與斯譜之修誠為義舉聞董其事者自十一祖永熾公始迄今班班輩出相繼而成所謂尊祖敬宗敦本睦族之誼不約而同耳要之明德之後必有達人由後觀前前之人已不可及由今觀後後之人而又未可量吾知恢宏先緒丕振家聲者固大有人也安見後之不更勝於前哉是為敘

賜進士出身選授漢中府城固縣知縣壬子科同考試官調繁改補西安府渭南縣知縣丁艱服滿補授山西朔平府馬邑縣知縣加三級紀錄十六次推陞雲南臨安府阿迷州知州請假回籍年家眷弟王邦光敬題

一修族譜贈序（四）

余以薄宦匏繫南楚君玉哉郵寄手書以家乘問敘於余余曰嘻是非蓄道德而能文章者不及此況久疎簡墨何有於傳世行遠哉雖然此固甚盛舉也仁人孝子之用心也事固可以行遠矣蓋人道之大莫大於親親親親故尊祖尊祖故敬宗敬宗必收族古已然矣自習俗之漓盛冠服侈輿馬廣聲氣趨勢利謂誇耀閭里無踰於斯至於一本九族間漠不加意味敦睦忘水源閱時既久幾何不等同祖之親如末路夫先王制禮其推而遠之服遞降而至於無服殺親疎也其引而近之世雖移而不忘百世重本支也則家譜之修蓋可忽乎哉楚君獨有志於此分支別派窮流溯源歷有幾年備極勤苦今將付諸剞劂藏諸家廟以垂世於無窮視世之漠不加意於一本九族間者其於為人賢不肖何如也且夫積功累仁克昌厥後而後人克念厥祖莫非祖考之慶長延楚以國為氏世有達人遞及有明復以勳臣保世滋大雖星羅碁布者不一方而古羅一支尤蕃昌未艾則前人之功德可知宜後嗣多賢有念於親親尊祖敬宗收族而亟亟於家乘之修也余既重君玉哉昆玉之請而尤極不忘此甚盛舉也敢不一言以誌其仁人孝子之用心哉

清乾隆三十四年乙丑孟春月

鶴田戴文熾魯朋氏頓首拜撰

二修族譜贈序（五）

家之有乘猶國之有志志紀山川夷險習尚奢儉人物秀鄙所以驗風俗也乘述族氏源流倫紀昭穆婚媾喪葬所以厚人心也人心正風俗亦因以端昔人云求忠臣必於孝子之門蓋於原本處矣其實培其根此國家所以相通也羅湘新平楚氏睿外祖父家也其先世成公於明初以捐軀赴敵之功受封而襲其子孫由襄陽衛晉長沙千戶來自有自矣睿幼時知楚氏為功臣後然未悉遷湘以來為子孫者何以溯其宗派聯其族屬以衍世德之清芬也今年夏丹亭舅氏手其家譜示以重修且命睿敘粵考其前此諸君子以經明行修之彥任建祠修譜之勞條若干訓若干典纂明矣第莫為之前無以啟後莫為之後無以光前茲復聚族而續葺之詳者因闕者補其雲初之遞起靡盡而高會詒範光遠而益有耀矣睿自薄逋歸慵疏廢鉛槧且才劣奚以敘舅氏譜惟是前任新甯時常以敦倫睦族為同學其豈於母黨而忘之嘗見世閥之門其譜牒所載祖訓家規非不釐然美備迨其後漸相忘於烏有者無人焉繼其後而續承耳舅氏其率由前典遺厥方來花累葉而同跌水千條而共幹綱 舉目張支分派合既不許宗滔強附令公亦自守狄青不慕梁公而已後之視今猶今之視昔行見姓氏 益芳倫紀遠紹薦蘿施於松柏蘋蘩潔乎豆籩人心厚而風俗醇孝子賢孫輝映於無盡也辭不獲命爰述譜之所係為之敘

清道光五年乙酉歲桂月誥授修職郎覃恩加三級寶慶府新甯縣教諭郭家睿惺吾氏頓首拜撰